

■ CONVIVENZA

Jau fiss gugent ina muntanella

DA BETTINA CADOTSCH*

Jau hai avunda da C. Jau hai udì avunda, jau hai legì avunda, jau hai simpla-main avunda. Jau na sai era betg quantas giadas che jau hai già scrit il pled «coronavirus». Ed jau pens che era Vus na possias betg pli udir quest pled. Per quest motiv dovrel jau per quest text sulettamain il bustab C (betg che quai faschess la situaziun bler meglra, ma forsa in zichel).

Igl è la fin da november, e quai vul dir che l'enviern stat davant porta. Jau hai gugent l'enviern. Quest onn fiss jau però gugent ina muntanella. Jau ma retirass gugent, faschess gugent in sien d'enviern e vegniss pir puspè la primavaira or da la tauna. Jau duvrass ina pausa da C.

Il mument sun jau numnadamain propi surdumandada: Nua pon ins anc ir? Cun tgi duess ins anc s'entupar? Tge è raschunavel e tge betg? Cura èsi finì? Èsi insumma finì insacura? Resta C. per adina qua? Igl èn dumondas e dumondas ed ina massa intschertezas che m'occupan.

Jau stun era propi mal per tuts: per ils uffants che ston crescher si durant il temp da C. Per ils giuvenils che giessan gugent en sortida e ston star a chasa.



Per ils geniturs che empravan da tegnair da buna luna lur uffants. Per ils umans che lavuran en ils ospitals. Per ils interprendiders che han problems finansials serius, per ils flaivels, per la glieud veglia ... Betg d'emblidar quels che han da batter cun culps dal destin persunals ed han pers insatgi. Jau n'hai betg spazi per numnar tuts. Jau na sai era betg dir, per tgi che la situaziun è mendra. La finala essan nus tuts pertutgads en ina moda e maniera. Ed insatge avain nus era tuts cuminaivel: nus tuts vulain simplamain enavos la normalitad.

Jau sai, enstagl da sa lamentar fissi da vesair las varts positivas. Enstagl da smaladir la situaziun fissi dad esser engraziaivel per quai che nus avain – danor la pandemia. E quai fatsch jau atgnamain era, propi. Jau giAUD mintga minuta or en il liber, jau giAUD las tschainas en pitschnas rundas, jau sun engraziaivla

che jau sai lavurar e che jau sun sauna. Ed jau sai era ch'i va bain cun mai cumpareglia cun auters. Jau manegel ch'i va en general bain cun nus en Svizra. Nus tutgain tar ils umans privilegiads sin quest mund. E tuttina, era sche jau sai tut quai: i ma fa mal d'acceptar che C. resta vivanant qua, che C. dictescha anc ditg nossas vitas e che las mascrinas d'igièna, ils dischinfectants ed ils placats dapertut enturn na svaneschan betg uschè spert.

Ed era sche jau schess ussa fitg gugent anc plets sabis – jau n'hai nagins. La pussaivladad da far in sien d'enviern sco las muntanellas n'avain nus deplorablamain era betg. Il sulet che jau poss dir: nus stuain tuts tegnair ensemen, gidar in l'auter, ans motivar da tegnair la dira ed ans far cler che quai passa insacura. Era sche nus na savain il mument simplamain betg, cura che quest INSACURA vegn ad esser. I vegn puspè meglie. Per franc.

*Bettina Cadotsch è creschida si a Savognin. Ella ha studegià Multimedia Production a la Scuola auta spezialisada dal Grischun a Cuir e lavurava tar Radio Südostschweiz, «suedostschweiz.ch» e la «Südostschweiz».

La convivenza da culturas – quai è il tema da las columnas che cumparan sut «Convivenza» mintga glindesdi en la Südostschweiz ed en La Quotidiana.